



Universitätsbibliothek Paderborn

Wyngaerden der sele

Veghe, Johannes

Hiltrup, 1940

33. Kap. Woe wy unsen wyngaerden in der sunnen setten sullen, up dat
he guede vrucht dragen mach

urn:nbn:de:hbz:466:1-30728

Mer als ick ledich byn van dy unde byn buten dy, so byn
 ick my selven last. Och we aldus kunde een luttel hechten
 an god, de mochte over all wesen in ghenoechten.^{1*} De wyn-
 stock, aldus up ghebunden, kan wonderliken groyen. In
 5 den boeke der leeften staet, dat de dochteren van jherusa-
 lem, dat syn engelen unde hilghen, spreken^{2*} aldus van der
 mynnender selen, over all verwonderende van eren ghee-
 steliken voertganck:¹ We is desse, de aldus up styghet ut
 der woestenyen, overvloyende van weelden unde levende
 10 of hechtende up eren ghemynneden brudegom.^{3*} Claerlike
 myt rechte mochten se em des upstyghens verwonderen ut
 der woestenyen desser ellendicheit, um dattet selsen is. Et
 is meer woentlic neder to^{4*} styghen um grote krancheit
 der^{5*} menscheliken natuer. Mer doch de mynnende sele
 15 kunde wonderliken upstyghen, nicht by eers selves
 cracht, mer um dat se myt all eren vermoghen henck up
 eren ghemynneden brudegom.^{6*} Also steech se up int hoech
 myt syn almechticheit, overvloedich in welden um syn
 guetheit, salich in tijt unde in ewicheit.

20

XXXIII. Kap.

Woe wy unsen wyngaerden in der sunnen setten sullen, up
 dat he guede vrucht dragen mach.

Natuerlike als de wynstock is ghebunden,^{7*} so kan he over
 al groyen, bloyen, dyn unde wassen, so moet he staen
 25 in der sunnen, anders en kan he gheen^{8*} kostel driven
 draghen, noch soeten wyn. Aldus is boven all noet der
 sunnen hette unde de sunne en kan em nicht wal helpen,
 als he te rijke is van loeff eder vull bladeren. Daer umme
 ist eerst behoerlike, dat de blader^{9*} werden af ghebroken.
 30 Aldus gheestelike, o ynnighe sele, en kanstu nicht schicken
 int gheestelike leven sunder de gracie godes unde hynderstu
 dy selven alto vake myt ydeler

^{1*} † sunder last ^{2*} sprekende ^{3*} — brudegom
^{4*} B. — to ^{5*} — der ^{6*} — brudegom ^{7*} upgebunden
^{8*} nyne ^{9*} † dar
¹ Cant. 8, 5.

kallynghe, de is ghelyck den bladeren anden wynstock unde
 hyndert der sunnen hette. Och de blader syn over al
 schone, breet, ghenoechlike, mer ummer sunder^{1*} vrucht.
 Aldus is manich mensche over all zedich van buten, in syn
 5 ghelaet, in synen woerden, in syn utwendighe hanterynge,
 recht of he te male hillich unde gheestelic^{2*} sy. Och he is
 vull blader sunder vrucht. De wyse man secht:¹ Des men-
 schen aerbeyt is in synen mond unde syn sele is ydel.^{3*}
 Dat is, he heeft blader der kallynghen, sunder vrucht der
 10 dogheden. Natuerlike de mensche heeft twe oghen, twe
 oren, twe handen, twe voeten, mer nicht meer^{4*} dan enen
 mund, in een teyken, dat he weynich spreken solde. De
 oren syn altijt open, de oghen syn myt enen vynster be-
 sloten,^{5*} mer de tunghe is dubbelt besloten in den kerkener
 15 des mondes, als myt lippen unde myt tanden. Daer by
 mach ellic verstaen, dat he sal wesen snell te horene,^{6*}
 maetlick te syene unde bescheydelick te sprekene. Al is
 de tunghe aldus ghesloten, nochtan is se also glat, listich
 unde cloeck, dat se kan beyde desse slote^{7*} doer breken
 20 unde beyde desse bande uplossen unde daer doer krupen
 int velt up et rume, over al lopende, dicke, dunne, hard,
 soete, dreck, slijck, blomen, loeff, guet, quaet, sunder mate,
 sunder toem, sunder ende kallynghe vull vorende, ghelyc
 als een wilt beest, dat nemant en kan tam maken. Jacobus
 25 secht:² De tunghe des menschen en kan nemand tam ma-
 ken. Et is een unrestich quaet, vull fenyns, daer vele
 lude an sterven. Ja se kan oick bynnen den kerkener des
 mundes, besloten bynnen lippen unde tanden, daer^{8*} kan
 se wonderliken unledich wesen unde vele unluckes maken,
 30 myt eer stadich blaffen ghelyc als een quaet hond in den
 banden. We daer

^{1*} † alle ^{2*} rechtverdich ^{3*} unde in syner zeile is he
 idel ^{4*} — meer ^{5*} geslaten ^{6*} † unde ^{7*} beide dusse
 slote kan ^{8*} — daer

¹ Eccle. 6, 7. ² Jac. 3, 8.

by komet unde daer teghen vechtet, de en kan nicht lich-
teliken blyven sunder wonderen eder unghebeten, mer we
van veers hen gaet, de mach vrij untkomen. De tunghe is
ghelijc ener moelen. Wat men daer up brenghet, dat maelt
5 se, et sy guet of quaet, weyte, haver, kaff, sand, nutte of
snode. Och desse moelen will altijt malen, als men de
schutten uptrecket eder de vloeghele loes maket an der
wynde moelen. Natuerlike als ment water lange tijt heeft
up gheholden myt stuwene, dan lopet de moelen aller
10 snellest int up trecken der schutten. Als gheestelike lude
langhe hebbet ghesweghen nae in sette eerre regulen,^{1*}
och^{2*} dan gaet de schutten loes, dan ruyschet dat water,
dan gaet de molen kassen, och of daer weyte of ander guet
koerne^{3*} up queme, dat syn nutte, stichtighe, gudee kal-
15 lynghe unde gheen sand of^{4*} kaf, of stene eder fenyn, of
mostert der ydelheit, der bitterheit, des achterclappens
eder verwytens of kyvens. Aldus ist overvloedich loeff
des wynstockes quaet, unnutte, schadelick, dat is, ydel
kallynghe. Matheus scrijft,¹ dat unse verloser, jhesus cri-
20 stus, ghenc up een tijt ut jherusalem all^{5*} hungerich. Up
den velde sach he enen vyghenboeme. He ghenck daer by,
soekende vrucht in em. Mer want he daer anders nicht en
vant dan allene loeff unde blader, so vermaledyden he
den vygeboem unde ter stond wort he over al soer unde
25 dorre oick in den wortelen. In ewicheit en droech he
gheen vrucht. O gheestelike menschen, ghy syn over^{6*} all^{7*}
vyghenbome, gheplantet in den hof der gheestelicheit, be-
sorghet myt beghyeten tijtliker gude van beneden unde
myt dou der graciën godes van boven, myt reghen, myt
30 sunnen, myt all,

^{1*} reghelen ^{2*} — och ^{3*} ander weyte of guet koern
^{4*} — of ^{5*} — all ^{6*} — over ^{7*} allen

¹ Matth. 21, 20.

dat ju noet is, over all^{1*} wall begavet, bynnen unde buten.
 Ist dat ghy gheen guede vrucht en draghet, als de here
 vrucht in ju soeket, hungerich ut syn mynlicheit um ju
 salicheit, claeरlike stae ghy sunder vyghen der inwendige
 5 ghen gheesteliken^{2*} soeticheit, duldicheit, ghehoersamheit,
 mynlicheit, all syn ghy over all vull blader van buten der
 zedicheit, der cledynghen, der callynghen, och dan sal he
 ju vermaledyen, dat ghi over all dorre werden unde soer
 10 in tijt, unsalich in ewicheit. Natuerlike als de wynstock
 over al is rijke van bladeren unde dichte myt loef, och
 dar machmen vynden manck den bladeren alto manygher-
 leye wormeken,^{3*} kleyne unde groet, als spynnen, vlyeghen,
 muggen, gaffeltanghen, de schulen manck den bladeren.
 Mer als men de bladeren umme keert eder^{4*} afbreket, dan
 15 werden se openbaer. Aldus ist in vele protynghe, daer
 alto manich ghebreck in verborghen is, dat nemand van
 buten merken en kan dan allene, de syns selves andacht
 grundeliken merket, de syn blat^{5*} kan umme kerent unde em
 selven van bynnen besyen.^{6*} De wyse man secht:¹ Vele pro-
 20 tynghen en is nicht lichteliken sunder sunde. Int ghemeyne
 komet alle misdaet van unbehoeerliken kallynghen, als twy-
 dracht, bitterheit, hate, nyde, unreynicheit, achterclap^{7*} unde
 voert an sunder ende, sunder ghetall. Alst all umme ge-
 kallet is, so en ist nouwe begunnen. O ynnighe sele, hoet
 25 dy van vele snackens. O edele wynstoc, en wil doch nicht
 vele blader draghen. Waerlike de blader verteren de vuch-
 ticheit der eerden unde verslynden den dou des hemels,
 also dat de edele druven te myn groyen in der vrucht der
 ynnicheit, der vuricheit, der mynlicheit, der oetmoedicheit,
 30 der duldicheit. Bernardus secht:² De

^{1*} † vull unde ^{2*} gheisteliken, inwendighen

^{3*} worme ^{4*} unde ^{5*} blader ^{6*} besyen van byn-
nen ^{7*} — achterclap

¹ Sap. 1,11.

² ML. 184,688 *Vitis mystica* c.27, n.89 „Sciunt etiam homines spirituales, qui hoc experti sunt, quantum auferat devotionis, quantum afferat dissolutionis intrinsecus frequens linguae resolutio.“ cf. 184,1197 „Rumores nescias, quia in mentem distrahunt, et devotionem exhaustiunt.“

tunghen is een bequeme reyschop, daermede kan ellic ut putten unde utghyeten dat water der ynnicheit ut den vaten syns herten, also dat he bynnen ydel unde ledich woert van allen graciën, um dat he also bereyt is altijt te pūttene
5 de wateren der ynnicheit mytter tunghen syner ydelheit. Item, natuerlike de manichvoldighe grote blader des wynstockes benemen den edelen wyndruven de hette unde^{1*} stralen der sunnen. Och aldus komet alto vele ungheluckes van vele^{2*} kallynghe als se langh, groet unde breet is. De
10 sunne der gherechticheit schynt over all ghelyck. Mer als de mensche der sunne en scherme te mote settet, so duet he em selven quaet. Dat en mach he der sunnen nicht wyten. De sunne is over al noet. Wat buten der sunnen wasset up der eerden, dat blijft kleyne, magher, bleke,
15 unghesond, unsmakelick unde en kan nicht rijpe werden. Aldus syn all unse werken snode unde verworpelick sunder de rechte leefte unde sunder godes gracie. De sunne treccket de^{3*} natuerlike vuchticheit ut der eerden doer den wynstock unde doer de rancken in de druvan unde myt eers selves
20 cracht unde hette ghift se daer wasdoem den druvan, dat se rijpe werden unde water in em werden verwandelt in wyn.^{4*} Dat is, de rechte leefte unde gracie godes maket unse water wyn, unse snode, koelde, unwerde werken verwandelende^{5*} in verdensteliken dogheden, de by em
25 selven verdoemelick syn, mer um de leefte untfanglick syn. Mer als de dicke, breeden bladeren dichte unde overvloedich syn in^{6*} den wynstock, dan blijft de vrucht snode, bleeck unde unbequeme. O ynnighe sele, snyt doch dat loef unde blader dyner manichvoldighen kallynghen van-
30 den wyn-

^{1*} † de ^{2*} unde ^{3*} eer ^{4*} cracht gyft se dar wasdoem
 den druvan unde van erer hette werden se rijpe unde water
 wert in em verwandelt in wyn ^{5*} werden verwandelt
^{6*} an

stoc dys gheesteliken levens. Jacobus secht:¹ De tung
 is een quaet stukke vul aller boesheit. De quade tunghe is
 over all ghelyc den helsschen vuer, dat selven bernet
 unde all dat em ghenaket untfenget.^{1*} De bose tunghe is
 5 ghelyc enen scharpen sweerde, dat an beyden syden snydet
 unde steket. David secht:² Der bosen menschen tunghe is
 een scharp sweert. Och dit sweerd kan vele lude doden
 in lijff unde in sele,^{2*} in ere unde in guet. De valsschen
 tunghe is ghelyc enen boghen eder arborst unde enen
 10 pyle, de kan schyeten unversyenliken unde veer. Jeremias
 secht:³ Der bosen tunghe is ghelyck een scherp pyle, de
 snell wondet unversyenliken unde^{3*} dyepe. De quade tunghe
 is ghelyck der fenynighen slanghen, de alte listich is van
 buten, mer alheel fenynich van bynnen. David secht:⁴ Der
 15 slanghen fenyn is under der bosen tunghe, unde se hebben
 eer tunghen scherp ghemaket als slangen. De mund, de in
 em besloten heeft ene quade tunghe, de is ghelyck als een
 doden graf, dat buten schone is myt bloemen unde kruden
 besat, mer bynnen vull stanckes. Als men dat graff dichte
 20 stoppet, soe ist in em selven snode, mer duet ment up, so
 gaet den stanck over all unde daer aff werden dan vele
 lude ghequellet mytten stancke. O snode graff, slutet dy
 selven, dattu all dynen naesten nicht en belastest. David
 secht:⁵ Eer kele is als een open graff. Myt eren tunghen
 25 hebben se ghedaen loesliken unde boesliken. O here,
 ordele se. De quade tunghe is ghelyck als^{4*} een^{5*} rasende
 hund. Al dat he bitet, wort oick mede rasende, ten sy
 dat em snellike ghehelpen werde. De tornyghe honde, de
 over all lichteliken bose werden unde vele blaffen, de
 30 werden meestelick rasich.^{6*} David secht:⁶ O here, verlose
 my ut der macht der hunden. De bose tunghe is ghelycke
 enen wilden peerde, dat sunder toem lopet, em selven

^{1*} *† dar af*

^{4*} — als

¹ Jac. 3,6.

⁵ Ps. 5,11.

^{2*} *in zele unde in live*

^{5*} *enen*

^{6*} *rasende*

² Ps. 56,5. ³ Jer. 9,8.

⁶ Ps. 21,21.

^{3*} — unde

⁴ Ps. 13,3.

quesset unde synen up sitter unde oick all dat em ghenaket.
 We vele kallynghe maket, de is ghelyck ener stat sunder
 mueren, daer de vyanden in gaet, als se selven willen, um
 de stad te dodene, te bernene, te rovene, te verdervene.
 5 Salomon secht:¹ Ghelyck als een borch off stad sunder
 mueren is,^{1*} also is een mensche, de syns selves gheest in
 syn kallynghe nicht en kan stueren. Och de woert over all
 woeste, ydel, arm, snode, bemaggelt. We syn vuer in der
 nacht under der asschen nicht en wil^{2*} bedecken, de vyndet
 10 des morghens enen koelden heert. O edele sele, stoppe dynen
 mond, soe bewarestu dynen vrund. In der oelden ee
 was den volke van israhel gheboden,² dat se all eer vaten
 solden boven dichte stoppen. Unde all eer vaten, de nicht
 en weren ghedecket of boven ghestoppet, de weren^{3*} all
 15 unreyne. De milde guetheit godes heeft dy begavet, o edele
 menschen, boven anderen creatueren in dyn tunghe, dattu
 spreken kanst, dat den anderen dyeren nicht ghegheven en
 is. Och en will doch desser gaven nicht misbruken int qua-
 de. Myt dyner tungen soldestu dyn quaet byechten, dynen
 20 naesten stichten, gode dancken, loven unde benedyen voer
 syn mildicheit in tijt unde in ewicheit. Unde sich, nu is
 dynen mond bet gheleerd int quade, dy selven verromende,^{4*}
 dynen naesten quellende, dynen god vertoernende. Myt
 dyner tunghen untfangestu dynen schepper up de borch
 25 dyns herten. He komet guetliken toe dy, in gaende over de
 toech brugge dyner tunghen, int kamerken dyns herten, um
 te restene up dat beddiken dyner leeften. Du hebst syn in
 komen herteliken begheert um dyn behoevicheit unde he is
 to dy^{5*} ghekommen allene um dyn salicheit ut syn mynlicheit.
 30 Unde sich, nu

^{1*} — is ^{2*} nicht under asschen en wil ^{3*} † over

^{4*} B. vermoeden (evt. vermoedende ermüdend?)

^{5*} B. — to

¹ Prov. 25, 28.

² Num. 19, 15.

wilstu em verraden overmits dyn bose quaetheit. De toech-
 brugghe dyner tunghen soldestu uptrecken unde sluten.
 Unde sich, du druckest se neder, over all mach in komen
 alle quaet, alle beesten unde alle unreynicheit. Och du
 5 haddest ghelovet dynen heren over all^{1*} truwe te wesene,
 over all doende, dat em behaghet, unde mydende, all dat
 synen oghen^{2*} mishaget. Aldus ghenck he do dy up dyne
 borch, up geloven. Unde sich, althant latestu in komen
 over de toech brugghe dyner tunghen alle syne vyanden.
 10 Kan he dan sunder schaden daer hen komen des en derf
 he nicht dancken dyner truwicheit, mer syner almechtic-
 heit. Och woe vake hebstu em aldus verraden myt dyn
 quaetheit. Nochtan is he bereyt altijt^{3*} weder te komene
 15 allene um syns selves guetheit. Och en will doch dit edele
 lyd dyner tunghen aldus lelike nicht beslabben in den
 drec der sunden unde boven all myt kyff, myt verwyt unde
 myt achterclap. De wevel vlucht over den brynck^{4*} vull
 bloemen, gras unde kruden, nerghent en kan he resten,
 dan allene in den perdes dreck. Daer is syn ghenoechte
 20 boven all. Aldus is de tunghe des achterclappers, over all
 swabbende int snodeste, dat in syns naesten leven is te
 vyndene. O aller snodeste wevell, beghiff doch dyn snurren
 unde dyn murren,^{5*} over all bistu snode unde over all dyn
 lijff ghewapent. Nemand en kan dy myt redene verwynnen,
 25 um dattu over all stijff blyvest^{6*} in dyn^{7*} begrijp. Och
 du bist alte blynt, du vleghest vake teghent holt, teghen
 yseren, tegen all daer du an komest in dyn duyster-
 heit, also stijff, dattu selven stortest. Nochtan wilstu all
 30 weder up kraulen^{8*} unde voert vlyeghen in dyns selves
 verhardicheit. Och dyn lijff is vull wormen der unreynic-
 heit, um dattu also vele swabbest, wroetest

^{1*} — over all ^{2*} eme ^{3*} altyd bereit ^{4*} over al de
 bryncke ^{5*} B. nurren ^{6*} bijst ^{7*} dyns selves
^{8*} upclauwen

unde boesest in den dreck unde dyn reste, dyn ghenoechte,
dyn soeticheit soekestu int aller quadeste, dattu vyndest
in dynen naesten. Dat kauwestu in dynen mond, dat malestu
tusschen dynen tanden, dat welterstu up dyne tunghe, dat
5 slukestu in dyn lijff, dat is dyn leven, ander luden dreck
te etene unde eer ghebreck te vertellene, te undersoekene,
te vraghene,^{1*} te wetene unde voert te segghene.^{2*} O aller
snodeste wevel, o aller unreynste achterclapper, over all^{3*}
haetlic in tijt,^{4*} unsalich in ewicheit, ten sy dattu bete-
10 rynghe doest.^{5*} Augustinus secht:¹ De sunde en wort nicht
vergeven, ten sy dat unrecht guet werde weder gheghe-
ven, also vele alst moghelyk is. Och woe vele unrechtes
guedes heeft de achterclapper myt unrecht ghenomen, de
ander luden gheruchte unde gueden namen, de boven alle
15 tijtlick guet gaet,^{6*} heeft benomen. Waerlike he is schul-
dich, em dat weder te ghevene na synen vermoghen vele
meer dan of he eer ghelyc of cleet^{7*} of ander tijtlic guet
hadde ghestolen. Och he solde van rechte elken to sun-
derghen in allen steden unde stonden syn guede gheruchte
20 weder maken over all,^{8*} daer he dat heeft besmyttet unde
beslabbet. O ynnighe sele, o edele wynstock, en wil doch
nicht vele blader draghen, aerbeyde myt vlyte, dyn loef
af te snydene unde dyn grote kallynghe te mydene in ydelen
woerden unde boven all in schadeliken woerden, in kijff,
25 in verwyt, in achterclap. Dan sal de dou des hemels unde
de sunne der ghorechticheit komen up dyn wyndruven, dat
se groyen, wassen unde rijpe werden. De dou vallet ghe-
lijck over all unde de sunne schynet up guet unde quaet,
also veer als se nicht belettet en werde myt yenich hyn-
30 der, to moete staende. Also komet godes gracie, claeheit,

^{1*} † *unde* ^{2*} *seggende* ^{3*} † *gode*

^{4*} † *unde* ^{5*} † *Sunte* ^{6*} *B. de boven all tijt guet, guet*

^{7*} *cedeler* ^{8*} *over all weder maken*

¹ *ML. 33, 662, Epistolarum classis III, Ep. 108, c. 6, n. 20*
„... non remittetur peccatum, nisi restituatur ablatum...“

mynlicheit, vuricheit, ynnicheit in allen herten, de em daer
to bequeme maken nae eren vermoghen. Aldus mach elke
sele wassen in gracien, ellic wynstock groyen, bloyen, dyn
unde rijpe werden, gode behachlick, synen naesten ghe-
5 noechlick, salich in tijt unde in ewicheit.

XXXIV. Kap.

Woe wy unse droven waren sullen, als se rijpe syn in den
10 wynhoff.

Natuerlike als de wyndruven in der sunnen staende unde
10 wal bedouwet over all wassende^{1*} unde beghynnen rijpe
te werdene, dan moet men se myt vlyte hoeden unde wa-
ren,^{2*} des daghes voer de voeghelen unde des nachtes voer
de dyeve. De voeghelen syn snel unde vlyegen int hoghe.
Daer by machstu verstaen de hoverdye unde ydel glorie.
15 Och desse voghele eten all dyne droven,^{3*} o ynnighe sele.
De hoverdye verdervet all dyne doghede, als se beghynnet
rijpe te werdene unde claer schynen voer den menschen,
ten sy dattu dynen wynstoc hoedest. Augustinus secht:¹
Werke unde woerde, de guet syn unde openbaer voer den
20 luden, de hebben wonderlike sterck an vechten overmits
begeerte des prysens. Item, Augustinus secht, voert:^{2 4*}
Ander sunden werden ghedaen in quaden werken, ellic nae
syn manyer, mer hoverdye verdervet oick guede wercken,
dat se vergaen moeten. O ynnighe sele, den wyngaerden
25 moet bewaert wesen. In den boeke der leeften staet:³ Se
hebben my gesat in den wyngaerden, dat ic den^{5*} solde
hoeden unde myns selves wyngaerden en heb ick nicht be-
waert. Natuerlike bewaertmen den wyngaerden manighes
synnes. Somyghen maken daer enen man van stroe buten
30 gheclendet, ghegordet, myt hoet, myt koghel. Den doen se
een armborst of een staff in syn hand,^{6*} dat he also de
voeghele solde veryaghen. Desse stroe man staet daer
in den

^{1*} wassen ^{2*} weren ^{3*} wyndruven ^{4*} — voert

^{5*} — den ^{6*} armborst in syn hant of enen staf

¹ ML. 33, 442, Ep. class. II, Ep. 118, c. 3, n. 22 „superbia
vero etiam in recte factis timenda est, ne illa quae lauda-
biliter facta sunt, ipsius laudis cupiditate amittantur.“

² ML. 33, 960, Ep. class. III, Ep. 211, n. 6 „Alia quippe
quaecumque iniquitas in malis operibus exercetur ut fiant;
superbia vero etiam bonis operibus insidiatur ut pereant.“

ML. 44, L. de nat. et grat.

³ Cant. 1, 5.